

Akordio mamitsurik gabe amaitu da basamortutzeari buruzko konferentzia

Herri pobre eta aberatsen artean ez ziren ados jarri aurrekontuen inguruan

Agentziak / Recife

Ostiralean bukatu zen Recifen (Brasil) Nazio Batuen Erakundeak (NBE) Basamortutzeari buruz egindako III. Konbentzioa. Desertifikazioaren kontrako hitzarmena sinatu zuten 159 herrialdeen arteko akordio garrantzitsurik ez zen gertatu, herri pobre eta aberatsak ez baitziren ados jarri konbentzioaren aurrekontuen inguruan.

EUROPAKO Batasuneko eta 77koen Taldeko herrialdeen artean gertatu ziren aurrekontuei buruzko tirabirarik handienak. Konbentzioko ordezkariak aitortu zuten, herrialde garatuek uko egin diote basamortutzea borrokatzeko diru gehiago jartzeari. Izan ere, haien irudiko, arazoa garapen bidean dauden herrialdeena da, eta ez denena. Beren ustez, herri pobreen arazoa da, ia Afrika herrialdeena bakarrik.

Lurraren %33ko eremua basamortutzen ari da. Urtero 42.000 milioi dolarreko galerak eragiten ditu munduan, eta 250 milioi biztanleri eragiten die.

Konferentziak eman zituen datuen arabera, EEBBak dira urtero nekazari eremu gehien galtzen duen herrialdea desertifikazioa dela-eta. Hala ere, EEBBek ez zuten sinatu hitzarmena.

Herrialde guztiek hitzartu



MILVYN CALDERON-ASIAPIX

Filipinetako Palawan eskualdean sute batek erabat kiskalitako oihana.

zuten Konbentzioak 6,3 milioi dolarreko aurrekontua izatea datorren urtean, eta 6,1 milioi dolar 2001. urtean. Jakina denez, 1992an Rio de Janeiron Lurraren egoerari buruz egin zen nazioarteko goi bileran hiru araudi hitzartu zituzten: bat klima aldaketari buruzkoa, bestea bioaniztasunari buruzkoa, eta azkena desertifikazioari buruzkoa. Herrialde aberatsak mundu mailako arazotzat dituzte lehen biak, baina azkena ez.

Bonnen izango da hurrengoa

■ RECIFEN bildutako 159 herrialdetako ordezkariak Bonn hautatu zuten basamortutzeari buruzko hurrengo bilera antolatzeko. Hain zuzen ere, datorren urteko urriaren 16tik 27ra bitartean egingo da konferentzia.

Hasiera batean, Asiako herriren batean antolatuko zela jakinarazi zuten, baina kontinente horretako

inork ez zuen bere burua eskaini konferentzia antolatzeko. Horregatik, konferentzia Bonnen egingo da deliberatu zuten, Alemaniako hiri horretan daukalako Konbentzioak egoitza nagusia. Australiak konferentziaren bat antolatzeko nahia azaldu du, baina ez du horretarako eskaera formalik egin konbentzioan.

Irungo Udalak Alardeko ordenantza aldatuko du, festaren antolatzailea ez izateko

■ PSE-EEk eta PPk osatutako gobernu batzordeak eman du asmoaren berri

Europa Press / Donostia

PSE-EE-K eta Partidu Popularrak osatutako gobernu batzordeak Alarde arautzen duen egungo udal ordenantza aldatzeko asmoa adierazi dute, Udala ez izateko festaren antolatzaile zuzena. Hala azaldu zuen Alberto Buen Irungo alkateak bi alderdiok hitzartu duten udal akordioa aurkezterakoan.

Azken urteotan Udala izan da Alarde ofizialaren antolatzailea. Buenek azaldu zuenez, Udalak bermatuko du bi alardeek beren desfilea antolatu ahal izatea; alegia, alarde tradizionala eta emakumeek eta gizonek osatutakoa.

Bidenabar, Miguel Buenek ziurtatu zuen Udalak bi aldean arteko elkarrizketa eta adostasuna bultzatzen saiatuko dela. «Udalak aldean arteko elkarrizketa bultzatuko du egun dagoen gizarte gatazka konpon dadin, eta San Martzialgo Alardearen inguruan dagoen ezin bizia amai dadin».

Iaz bi alarde izan ziren Irunen: bat eskopeta zeramaten emakume eta gizonez osatua; eta bestea, gizonez osatua.

Espainia, Portugal eta Gibraltarko talde ekologistak bildu dira asteburuan Iruñean

■ Haize energia eta uraren kudeaketa izan dituzte mintzagai, besteak beste

Irene Arrizurieta / Iruñea

EUSKAL HERRIKO, Espainiako, Portugalgo eta Gibraltarko talde ekologistak bildu dira asteburuan Iruñean, urtero egiten den Naturaren Defentsarako Iberiar Batzarren (CIDN) baitan. Batzarrek 30.000 kide baino gehiago ditu, eta horien artean dago Gurelur taldea.

Besteak beste, ondoko gaiak izan zituzten hizpide: gobernuak haize energia lortzeko dituzten planak, uraren kudeaketa, eta 2000 Natura Sarearen II. Nazioar-

teko Batzarren prestaketa. Puri Canals Iberiar Batzarreko presidente eta Kataluina Depana talde ekologistako kideak azaldu duenez, bilaren helburua da, batez ere, heldu den urterako Iberiar Batzarrek dituen erreserba biologikoen kudeaketa moduak eta talde bakoitzak dituen helburuak bateratzea.

Era berean, Portugalen egitekoa den 2000 Natura Sarearen II. Nazioarteko Batzarra prestatzen ari ziren, euren lana toki horietan nola garatzen den ikuskatzea baitute beste xedeetako bat.

Bestalde, haize erroten afera ere aztertu zuten. «Nafarroan bezala, Katalunian ere egituraketa zentzugabea egiten ari da, eta beste taldeekin jarrerak bateratu nahi ditugu», azaldu du Canalsek.

Ildo beretik, uraren kudeaketa politika kritikatu du. «Kudeaketa Espainiako Estatuarena denez, beste herrialde batzuetan ere badu eragina; Portugalen, esate baterako. Estatuko Hidrologi Planak uraren erabilera tamalgarria bultzatzen du, ura aurreztu beharrean».

Euskadiko Orkestra Sinfonikoa

LANKIDE IZATEKO

AUDIZIOAK

BALDINTZAK:

- Adinez nagusia izatea
- Titulu profesionalen jabe izatea
- Autonomia Erkidegoan, Nafarroan edo Iparralden bizi edo jaioa izan

IZENA EMATEKO EPEMUGA:
1999ko abenduak 15

AUDIZIO EGUNAK:
2000eko urtarrilaren 13tik 28ra

INFORMAZIO GEHIAGORAKO

Euskadiko Orkestra Sinfonikoa

Miramón Pasealekua, 124 • 20014 DONOSTIA

Tfno. 943 30 83 32 • Fax 943 30 83 24 • E-mail: artistas@orquestadeeuskadi.es